

MEMORANDUM

O RAZUMIJEVANJU I SARADNJI O USPOSTAVI I FUNKCIONIRANJU RADIO MREŽE ZA OPASNOSTI OD PRIRODNIH ILI DRUGIH NESREĆA U BOSNI I HERCEGOVINI

između

Ministarstva sigurnosti Bosne i Hercegovine, sa sjedištem u zgradi Institucija Bosne i Hercegovine, Ulica Trg BiH broj 1, u Sarajevu, *s jedne strane*,

i

Nevladine organizacije:

Asocijacija radio amatera u Bosni i Hercegovini, sa statusom pravnog lica, sa sjedištem u Ulici Franca Lehara 5, u Sarajevu, *s druge strane*,

U daljem tekstu: Ugovorne strane,

Stupanje na snagu: 01. 03. 2011. godine

OPĆE NAPOMENE

Polazeći od činjenice da su Vijeće ministara Bosne i Hercegovine i nevladin sektor 7. maja 2007. godine potpisali Sporazum o saradnji između Vijeća ministara Bosne i Hercegovine i nevladinog sektora u Bosni i Hercegovini;

Imajući u vidu da pomenuti Sporazum potvrđuje opredjeljenost Vijeća ministara BiH i nevladinog sektora u BiH da ojačaju svoje obaveze i odgovornosti u ispunjavanju preuzetih uloga i razvoju i kreiranju javnih politika;

Uzimajući u obzir da Sporazum predstavlja polaznu tačku za razvoj partnerstva, a počiva na vrijednostima humanosti i uzajamnom poštovanju, te da je nastao kao izraz potrebe da se utvrde okviri saradnje i izgrade institucionalni kapaciteti za djelovanje u prirodnim ili drugim nesrećama;

Pozivajući se na zakonske obaveze i međunarodne obaveze i strategijski opredijeljene pravce Bosne i Hercegovine za članstvo u vodećim euroatlantskim i drugim regionalnim organizacijama, odnosno:

- na odredbe Okvirnog zakona o zaštiti i spašavanju ljudi i materijalnih dobara od prirodnih ili drugih nesreća u Bosni i Hercegovini (dalje: Okvirni zakon o zaštiti i spašavanju),
- na UN Tampere Konvenciju o pružanju telekomunikacijskih resursa za ublažavanje katastrofa i operacija spašavanja i pomoći iz 1998. g., koju je BiH ratifikovala 2004. g.,
- na preporuke UN-ove Međunarodne telekomunikacione unije (ITU): Efektivna primjena radio amaterskih servisa u slučajevima katastrofalnih nesreća i operacija spašavanja, M.1043-2 iz 2003. g., ITU-D 13.1 iz 2006. g., M.1042-3 iz 2007. g.,
- odredbe individualnih partnerskih programa za članstvo Bosne i Hercegovine u Sjevernoatlantskom savezu (NATO), u kojima je utvrđeno razvijanje komunikacijskih sistema, te uspostavljanje kapaciteta odgovora na prirodne ili druge nesreće u Bosni i Hercegovini;

kao i na:

ciljeve sadržane u Strateškom planu Ministarstva sigurnosti Bosne i Hercegovine za period 2009-2011 u kojima se predviđa uspostava formalne saradnje sa nevladnim sektorom u BiH,

Sagledavajući značaj podrške koju radioamaterske organizacije, kao nevladine organizacije, mogu pružiti institucijama vlasti Bosne i Hercegovine u izvršavanju njihovih sistemskih poslova u svrhu zaštite i spašavanja ljudi i materijalnih dobara od prirodnih ili drugih nesreća u Bosni i Hercegovini,

Ugovorne strane **definišu sljedeće:**

Potpisivanjem ovog Memoranduma o razumjevanju i saradnji, uspostavlja se formalna institucionalna saradnja. U skladu sa društvenom ulogom, nadležnostima i misijama ugovornih strana, predmet ove saradnje bit će **„uspostava komunikacijskih sistema na nivou Bosne i Hercegovine za funkcionalnu koordinaciju međunarodne pomoći u prirodnim ili drugim nesrećama.“**

Ministarstvo sigurnosti BiH i Asocijacija radio amatera izražavaju spremnost, da kroz buduće zajedničke aktivnosti značajnije unaprijede oblast saradnje u uspostavi, funkcionalnom održavanju i razvoju radio mreže za opasnosti, u skladu sa Okvirnim zakonom o zaštiti i spašavanju, a po preporukama i standardima UN-ove Međunarodne telekomunikacione unije (ITU), tj. Međunarodne unije radio amatera (IARU), te preporukama NATO Komiteta za planiranje civilnih komunikacija za vanredne situacije (CCPC). Saradnja ugovornih strana će se odvijati kroz sistemske poslove u zakonom određenim oblastima djelovanja Ministarstva i u skladu sa ulogom i zadacima radio amatera u komuniciranju u slučaju prirodnih ili drugih nesreća, a koji su predmetom modaliteta saradnje utvrđenih ovim Memorandumom.

Memorandum je potvrda opredijeljenosti Ugovornih strana da, kroz eurointegracijske procese usmjerene ka pristupanju i punopravnom članstvu BiH u NATO-u i EU, kao i druge regionalne i bilateralne inicijative, reprezentativno i kvalitetno unaprijeđuju oblast sigurnosti u Bosni i Hercegovini.

MODALITETI SARADNJE ZA IMPLEMENTACIJU PROJEKTA

- 1) Predmet saradnje po ovom Memorandumu podrazumijeva sljedeće modalitete podrške i saradnje:
 - a) u procesu usklađivanja propisa i pristupanja vodećim euroatlantskim organizacijama, pružanje pravne i stručne tehničke pomoći u harmonizaciji postojeće regulative BiH međunarodnim pravnim normativima i standardima u oblasti savremenih komunikacijskih sistema, i donošenje potrebne nove regulative;
 - b) Stručni angažman i podrška Operativno- komunikacijskom centru BiH – 112, kao i operativnim centrima u entitetima i Brčko Distriktu, u vanrednom obavještanju putem radio mreže o opasnostima i nastalim prirodnim ili drugim nesrećama velikih razmjera, sa prekograničnim efektima, kao i osiguranju neprekidne radio komunikacije unutar i izvan Bosne i Hercegovine;
 - c) operativna komunikacijska podrška djelovanju mješovite specijalizirane jedinice za zaštitu i spašavanje na nivou Bosne i Hercegovine u međunarodnim intervencijama pomoći u prirodnoj ili drugoj nesreći;
 - d) podrška i pomoć angažmanom u koordinaciji prijema i pružanja međunarodne pomoći u slučaju prirodnih ili drugih nesreća;
 - e) saradnja u obukama, seminarima, radionicama, vježbama i drugim specijalističkim modulima obučavanja i drugim značajnim događanjima u BiH i u inostranstvu;
 - f) uzajamna saradnja i podrška u izradi Okvirnim zakonom utvrđenih planskih dokumenata u oblasti zaštite i spašavanja, u domenu komuniciranja;
 - g) saradnja u teoretskom i praktičnom obučavanju i osposobljavanju zaposlenih operatera u Operativno – komunikacijskom centru BiH – 112 i Ministarstvu sigurnosti BiH, a po iskazanoj potrebi i operativnih centara u entitetima i Brčko Distriktu BiH, kroz zajedničke programe obuka i vježbi;
- 2) U predmet Memoranduma mogu biti uključeni i drugi oblici saradnje u oblastima sigurnosti i zaštite iz nadležnosti Ministarstva sigurnosti Bosne i Hercegovine utvrđenih Okvirnim zakonom o zaštiti i spašavanju, kao i Zakonom o ministarstvima i drugim organima uprave Bosne i Hercegovine i pojedinačnim zakonima koji uređuju oblasti komunikacija iz nadležnosti Ministarstva sigurnosti BiH,
- 3) Trajanje Memoranduma nije vremenski ograničeno, što se evaluira godišnje procjenom rezultata projekata koji su predmetom ovog Memoranduma, a koju će izvršiti Ugovorne strane.

NADZOR NAD PROVEDBOM MEMORANDUMA

- 4) S ciljem osiguranja implementacije projektnih aktivnosti u Bosni i Hercegovini, ugovorne strane formiraju zajednički tim koji vrši redovan nadzor i evaluaciju rezultata saradnje.

- 5) Ugovorne strane će održavati redovne sastanke najmanje dva puta godišnje, a u skladu sa planiranim aktivnostima i vanrednim potrebama i češće.

RELEVANTNI ZAHTEVI UGOVORNIH STRANA

- 6) Asocijacija radio amatera u BiH iskazuje nepodijeljenu spremnost da u skladu sa svojim mogućnostima i kapacitetima intenzivno radi na implementiranju ciljeva i uloga predmetnog Memoranduma, te izražava nadu da će, kada za to postoji potreba i finansijske mogućnosti, dobiti adekvatnu materijalno-tehničku i drugu zakonom predviđenu podršku Ministarstva sigurnosti BiH prilikom iniciranja aktivnosti koje zahtijevaju angažman unutar ili izvan Bosne i Hercegovine u slučaju opasnosti ili nastalih prirodnih ili drugih nesreća.
- 7) Ministarstvo sigurnosti BiH saglasno je i spremno da, shodno zakonima i podzakonskim aktima utvrđenim nadležnostima i planiranim sredstvima za realizaciju zadataka i projekata, traži i uključuje ljude i materijalno-tehnička sredstva druge ugovorne strane u aktivnosti utvrđene u modulima saradnje, kao i da u skladu sa zajedničkim planiranjem osigura nabavku materijalno-tehničkih sredstava i opreme za komuniciranje.
- 8) Materijalno-tehnička sredstva i opremu, osigurane iz donacija ili planiranih budžetskih sredstava, druga Ugovorna strana će koristiti neograničeno, uz obavezu čuvanja, održavanja i stavljanja u brzu upotrebu na kratak i jasan poziv Ministarstva sigurnosti BiH, a u slučaju nastale opasnosti, prirodne ili druge nesreće, ili druge situacije koja nalaže primjenu tih sredstava i opreme.
- 9) Vidovi i oblici podrške, te planirani obim saradnje bit će definiran aneksima Memoranduma na osnovu inicijative neke od ugovornih strana.



ZAVRŠNE ODREDBE

- 10) Memorandum je neograničenog trajanja, ali može biti prekinut na zahtjev ugovornih strana na osnovu najave najmanje mjesec dana prije otkazivanja, uz detaljno obrazloženje razloga takve odluke.
- 11) Ovaj Memorandum o razumijevanju i saradnji potpisan je u 2 (dva) istovjetna primjerka, na službenim jezicima u Bosni i Hercegovini (na dva pisma), gdje svaka ugovorna strana zadržava po jedan primjerak na svakom od jezika i pisama.

Potpisano u Sarajevu, dana _____ 2011. godine.


Za Ministarstvo sigurnosti
Bosne i Hercegovine

Sadik Ahmetović, ministar sigurnosti


Za Asocijaciju radio amatera
u Bosni i Hercegovini

Daniel Horvat, predsjednik